

槎 餘

上 菴

老 雜

舌 錄



11905

槎
上
老
舌

陳
衍
撰

中
華

書局

叢書集成初編

槎上老舌（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

槎上老舌

閩中陳衍撰

衍往歲好於燈下與客談。擇而筆之。曰篝燈碎語。後得古木根一座。形如槎。踞其上。則又與客談。客意怠。貌藐然聽之矣。嫡孫年十二。差能作文。而善問。試語之。若解若不解。但視對客時。則體愈舒而口愈滑。退而亦筆焉。以教孫也。題曰老舌。顧子亦將老耳。將老則多憂。藉談以發洩之。將老則憶往事。藉談以更張之。將老則健忘。故有所談亦隨談而隨錄之。雖然。日月逝矣。舌猶存乎否也。

九六

易之六爻。數用九六。先儒皆以九爲老陽。六爲老陰。君子欲抑陰而扶陽。故陽則用極數。而陰但取中焉。予按陰陽。天道也。豈人所能進退。每思天地之數。曰一。曰二。曰三。曰四。曰五。止矣。至於六。則各有配合。非正數也。作易者。用生數。不用成數。以生。則無窮盡也。故有參天。兩地之說。曰參天。一三五是矣。曰兩地。二四六是矣。一三與五爲九。而二與四爲六。此九六之義也乎。如先儒言。恐非本旨矣。

高春

日經於泉隅。是爲高春。頓於連石。是爲下春。此淮南鴻烈中語也。唐詩。隔谿遙見夕陽春。又。空齋不語坐高春。皆本於此。

無傳之事

古事無傳於後者。有數種。劍法、嘯、砑、舞、彈、碁。然至大而不可不傳者。爲音樂。至腐而不必傳者。爲尸祭。

風聞

臺省得風聞言事。出漢書。尉佗曰。風聞老夫父母墓已壞削。又晉書顧和對王導曰。明公寧史網漏吞舟。何忍採風聞以察察爲政。此風聞二字原始。

卜

卜筮。聖人以決大事。然亦所以垂教。夫人知凶之當避。則凶德不可爲矣。知吉之當趨。則吉事不可不爲矣。如師曠季札卜以音樂。子游子夏卜以威儀。益見理數之相關夫。

無心

以己之無心。使物無心。道家清虛之說也。以物之無心。爲己無心。佛氏廣大之說也。

未濟

卦終於未濟者。以事無終窮。而道之無盡也。微旨遠矣。

占候別解

從古治日常少。亂日常多。故水旱、寇盜、奸臣、鄙夫。猶未足爲敗亡之徵。惟草澤中多冤毒英賢。是將爲楚材。皆用之兆。最可慮者。故歷代鼎沸之世。必多奇人。善觀人事者。於此可想。

墓誌之始

昔有盜發比干墓，得一銅盤，其銘曰：左林右泉，前岡後道，萬世之寧，茲焉是寶。此墓誌之始乎？孔子之喪，公西赤誌之；子張之喪，公明儀誌之。

陰陽至變

勾容縣半陽湖，其水同一壑也，而半冷半熱。又皆有魚，魚交入則死。此予所目擊者。又聞崇寧有井，大石蓋之，蓋上開二竅，一汲一染，一汲以造餚，反用輒無成，造物萬殊之妙，乃若是。

清平調

太白乘醉應詔，倉卒對御作詩，便協宮商，卽被管絃。此千古奇才，且以楊妃比飛燕，居然納牖，又視貴瑤如阜，役然非浩氣。蓋世者不能，故善讀清平調者，當知樂律之工，豈徒詩而已？如以詩而已，其句固不甚妙也。善觀太白者，當知英傑之雄，豈徒詩人而已？如以詩人而已，其人亦何足貴也。太白有友某死，自負其骨，走數千里歸葬，胸中一團道義，宜乎其能忘勢矣。

一飯不忘君

子美忠憤，大半是熱中，蓋獻賦得官，原非清高之士。一經淪落，難免汲汲耳。視青蓮於納陛之前，敷陳諷諫者不同。

陸玩鄭紫

唐陸玩拜司空曰。以我爲司空。天下無人矣。鄭紫拜相曰。歇後鄭五作宰相。時事可知矣。然自二公之後。遂不聞此德音。豈在位者皆臯夔。吾斯真足以自信耶。

蜀道難

蜀道難題。梁張怛所作也。李白因而續和。白少年時。獻詩於賀監。已有此篇矣。時嚴武未作西川節度也。古人賦咏。豈必便有所指。後人附會其說。過矣。

佛法

龐居士云。一切空諸所有。謹無實諸所無。二十七祖云。入息不居空界。出息不涉衆緣。生死所不能制。鬼神所不能窺。達磨云。將心來與汝安。以上諸語。皆直截明徹。真實妙諦。該括三藏。豈後世棒喝惡套。

曲譜立名

製曲者。當其宮徵既協。隨事觸境。各立一名。今謂之曲牌名。以爲辨別。備遺忘也。唐楊妃壽日。製樂尙未有名。東川貢荔枝適至。遂名其曲爲荔枝香。他如菩薩蠻。望江南。皆卽此類。別無意義也。然古人皆有其聲。方譜以辭。非以辭爲聲者。白樂天詩云。繇來能事各有主。楊氏創聲。君造譜。是一人創聲。一人創辭。兩者俱知音。故能成其歌曲。

五音所屬

聲音之分別。皆起於唇、喉、齒、舌。如商之屬齒。角之屬喉。徵之屬舌。羽之屬唇。宮之統四音而居中。隨人隨

地。試一調之。無少差謬。孰謂其可以意爲增減哉。人惟未之學。未之思耳。

鄉先輩素絲

永樂乙未。會元洪公英。以都御史還家。有十擡。士紳疑皆輜重也。相戒不與通。後公知之。微咲。令取几案。盡開諸笥。乃圖籍耳。於是出圖籍案上。置十擡空楨於案下。時屋淺狹。門外人咸共窺探。士紳方往來如初。嗟夫。以此觀之。彼日不但洪公一人清介。閩郡風尚。俱可知矣。清則儉。儉則不奪閭里。生當其時。何幸哉。何幸哉。

文體繁簡

文章繁簡有體。而調度自古爲難。試以史記二篇觀之。秦本紀繆公亡馬事。岐下野人共得而食之者。三百人。按三百人食馬多少。下文又曰。吏逐得。欲法之。按多少吏士。一時盡擒三百人。作史者。若備載馬數。人數。文法。癡重矣。不備載。又無稽。繁簡之體。當若之何。凡此。卽謂之簡而脫略可也。蕭相國世家。高帝曰。夫獵。追殺獸兔者。狗也。言獸矣。又言兔。何也。令蕭何賜帶劍履上殿。曷不曰。賜何劍履上殿。言令。又言賜。凡此。卽謂之繁而重複可也。嗚呼難哉。

平仄

上聲二仄。去聲三仄。入聲四仄。

禰衡

正平誕妄喜事人耳。非真學術也。觀鸚鵡賦可見。賦中許多憔悴乞憐。而卒不免。當日鼓吏豪邁之氣安往耶。魏武最忌才。獨肯置正平於敵國。亦真知其無實用者。

龍雀

其狀鳳頭龍尾。身備五色。一名飛廉。漢以銅鑄其像。以飾宮殿。古賦。天馬半漢。龍雀蟠蜿是也。姚秦。元魏。又以飾兵。故刀亦名龍雀。

圮上偶見陳眉公詩。五更常失圮橋期之句。是誤圮作已音。因記之。

楚人謂橋曰圮。子房授書圮上。圮音怡。卽橋也。則旣言圮矣。何得又言橋。字訛。并其義亦訛。文人忽略處也。

大率

凡大都。大約。大率。皆數學中語。率音類。然率更之率。則音律。將率之率。則音帥。

舉案

案。有足之檠也。古人席地所用。或對王弼州云。孟光齊眉之舉。不無重大難勝。弼州曰。孟光力舉石臼。何難一案。皆疑是今之几案矣。又古詩。何以報之青玉案。設若今之几案。安有許大之玉乎。

周髀

此歷家算法。髀。股也。周髀。猶言勾股。九數惟勾股最精。橫曰勾。直曰股。

昌

書名卷冊也。真語以卷爲昌。音周字書又加一畫爲昌。音鳩未知孰是。

五老榜

唐昭宗賜陳光問、曹松、王希羽、鄭希顏、劉象等五人及第，號爲五老榜。蓋光問年六十九，松年五十四，希羽年七十三，希顏年五十九，象年七十也。內惟曹松、劉象有詩傳後。

秦善用

凡有功於秦者，皆列國之遺才也。公孫鞅、范雎、張儀、魏冉，皆魏人。百里奚、虞人。樓緩、趙人。李斯、楚人。當時不問形勢之強弱，足知列國之君不能收攬英才，非秦敵手矣。然獨無齊人，何也？此齊所以有東帝之稱歟。

坤爻之變

坤卦文言：坤至柔而動也剛。按坤之爲動，就其爻之變者言也。諸家解說，專於坤德上發明，轉覺糊塗。觀其在初爲復，在二爲師，在三爲謙，自是以往，無非剛者。若但以柔能生剛，則陰陽至理，原自如是，固不待贅。

縣名魚復

川水至魚復之江爲上流，凡魚入川者至此，卽不能逆游而上，必復卻游，故謂魚復。而縣之所由名也。曹

龍始先生以對局傷

集大成

古樂一變爲一成，然必九變而後樂終。至九成皆畢，謂之大成。孔子之謂集大成，蓋集衆樂之大成，非但一樂之大成也。

鳥號之弓

柘枝之勁者，鳥栖而亞之，及鳥飛起，其枝倒拂而仰彈鳥，鳥爲之號。古之善弓，取其材，又命名以識焉。

五軍嚴密

祖制五府軍數，外人不得預聞。惟掌印都督司其籍，前兵部尙書鄺野向恭順侯吳某索名冊稽考。吳按例上聞，鄺惶懼疏謝，然則掛名竄籍之輩，何從而察之？東直門外二十馬房，每房以太監三人收掌，其馬數亦不許外廷會計。

綱目

綱目中文法遠遜資治，向屬可疑。近見丹鉛總錄，乃朱子門人趙師淵奉師命所編，非文公手筆也。文章信有階級矣。

詩注好用何字

過臻于衛，不瑕有害。舊注瑕，玷也。若曰：雖無有玷，得無有害乎？朱子改作瑕，何也？假以溢我，舊注假，大也。

於義甚順。朱子又改作假何也。此衢州葉公秉敬曾爲余言。公藏書萬卷。皆手自較讐。未嘗一刻他及。

枝梧

大柱曰枝。小柱曰梧。相倚以成屋者。

揚雄韓愈

二公不過文人。班馬之流亞也。宋以子雲配享廟庭。以退之比孟子。皆千古不平事。

數必前定

孟子禍福無不自己求之者。此設教之言也。其實不盡然。舜之蒼梧。文之姜里。孔之陳蔡。之匡。豈其德不足勝災乎。故曰。聖賢亦莫逃乎數。

先輩風流

何大復在京師。每宴會。聞官途俗談。及鄙務瑣語。輒閉目終席。不復款接。一日偶病脾。適公事同寅會食。何令隸人持園桶於酒筵之旁。坐其上。手一編。若無人也者。孫太初一日預羣公宴集。衣領上虱墮。因索湯浴於堂上。竟席短衫不復冠裳。吟諷自如。曹能始任四川參政。必於公館中另說几案。隸人置書几上。三司諸公咸在。先生但對衆一揖。卽就几披閱。文人風義自賞若此。亦惟其時人心尙古。虛懷服善。遂得相安。故三君不至如宋之歐蘇得謗得禍也。若今日雖有才士。敢于庸衆之前一掉頭耶。

亭午

梁元帝纂要。日在午曰亭。在未曰映。然亭午。人所常用。映。則鮮見。惟王仲宣詩。山岡有餘映一句耳。

景龍觀鐘銘。楊本林異卿所藏。

原夫一氣凝真。合紫虛而構極。三清韞秘。控碧落而崇因。雖大道無爲。濟物歸於善貸。而妙門有教。滅咎在於希聲。景龍觀者。中宗孝和皇帝之所造也。曾城寫質。闔苑圖形。但名在鸞林。而韻沈鐘簴。朕翹情八素。締想九原。命彼鼓延。鑄斯無射。考虞倕之懿法。得晉曠之宏規。廣召鯨工。遠徵覺匠。邪谿集寶。麗壑收珍。警風雨之晨節。昏明之役。飛廉扇炭。屏翳營繡。鸞鶴呈姿。蹲熊發狀。角而不震。侈而克揚。庶其曉散。靈音鎮入。鸞鸞之殿。夕騰仙韻。恆流雉鵠之闌。豐俗聽而咸痊。迷方聞而永悟。洪鈞式啓。寶字攸鑄。銘曰。紫宸御歷。青元樹因。傾巖集寶。竭府收珍。杜瓊律應。張永規陳。形包九乳。儀超萬鈞。上資七廟。傍延兆人。風嚴調急。霜重音新。自茲千載。從今億春。縣玉京而薦福。侶銅史而司晨。景雲二年。太歲辛亥。金九月癸酉。金朔十五日。丁亥。土鑄成。以上文體整麗。用事如。鸞林。八素。鼓延。邪谿。屏翳。青元。杜瓊。張永。九乳等字。皆不知所出。安得起楊升菴。胡元瑞二公於九原。拜而問之。如衍淺陋。真堪媿死。

六書

一象形。日月之類。二指事。上下之類。三諧聲。江河之類。以形事意而取聲相成也。四會意。止戈爲武。人言爲信之類。五轉注。轉音以注。因爲別字。老壽考者之類。六假借。彙言成字。借爲別用。能朋之類。按此雖小

學不可不知。朱子與楊元範書云：「字書音韻，是經中一事。此處不理會，卻枉費了無限亂說牽補，而卒不得其本意，甚害事也。」觀晦翁此言，則字學亦非細務矣。

小奸熟套

竊聖賢餘瀝以市名，奪他人所有以市恩，親朋之物必攘，湖海之交必牢，語言句句理義，衮影事事慚惶，無限精神，只博得勢利中牙僧而已，可憫也。

文士致貧之道有十

一、讀書必博，不得不廣購異帙；二、聲氣所及，不得不濫交同人；三、專精經史，豈計米鹽；四、筆研紙墨，綺牕棐几，難容粗惡；五、厭惡俗子，無由知致富之術；六、書冊之外，凡圖畫、彝鼎、花卉，皆其性靈所近，不無旁及；七、自古錦心繡口之士，必多屬情，偶爾蹠蹠，使自多費；八、騁懷遊目，歷覽山川，舟車樽俎，安能寂寞；九、天下之利，盡入權豪，阿媚曳裾，寸心不屑；十日夕與聖賢相對，性必嫉惡，筆舌之間，難免構杌，獲罪破家，勢所必至。以上十種，雖欲不貧，不可得也。然視盲目聾耳而擁巨貲者，亦如單棲黃鸝，下睺羣豕耳。

少正

少正卯者，其人名卯，而官少正也。當時魯與鄭皆有少正之官，列於卿，故子產亦稱少正。

鄧禹馬武

漢世祖嘗與功臣諸侯王讌語，從容言曰：「諸公不遭際風雲，爵祿何所至乎？」鄧禹曰：「當得文學博士，帝以

功曹許之。馬武曰：「當守尉督盜賊。帝以亭長許之。夫寸具如二君者，不遇知己，官位僅僅博士亭長，且不可必得。然則時運不偶，埋沒多少英傑，甚至凍餒蓬蒿中者，不勝數也。然鄧禹幸爲功曹矣，馬武幸爲亭長矣，而官三公卿相大司馬者，是何等人也？嗟夫！」

萬萬差別

万字、音墨。有姓万俟者，乃得用之，以外無義可據。今通作萬，本起於晉人尺牘，其實非也。

宋儒韜略議論

孔子沐浴而朝，以討陳恆，其微意欲以桓文之事張魯也。朱子謂當先發後聞，夫子於時安得有兵權，而能先發耶？城濮之役，晉文功在天下，胡文定謂不宜用詐，以楚之強，王室岌岌乎其殆矣，危而復安，安問其兵之詐否也？宋儒韜略議論，真可笑。

星命

日者以干支定人禍福，起於唐兵部員外李子平，然干支生尅之外，又有微妙難言者。吾鄉先輩按察使王公應時，年月日時皆屬火，於法不當貴，有精此術者，疑其生於江海之上。公曰：「時雨潦方漲，大水入屋，母夫人架板於水而生耳。」蓋干支雖極燥，而適逢大地真水，足以相制，反爲顯貴。又陳公紀官僉都御史，與一水夫八字皆同，一日者研推兼旬，方請曰：「公生時當在星斗之下，不然弗貴。」驗之果然。太夫人婉公，倉皇露處於園圃中也，以此觀之，干支卽甚靈，又有別解矣。聞之林道望云。

京兆

目十萬曰億。萬萬億曰兆。萬萬兆曰京。故王者所都爲京兆。言聚人之衆也。

廉士未仁

子曰。爵祿可辭也。中庸不可能也。穀梁曰。輕千乘則可矣。蹈道則未也。然則廉潔二字。豈足盡君子生平。況夫并廉潔而喪之耶。

婦人不用表德

伯仲叔季。古之行第。不但男子。婦人亦有之。如孟姜。季姜。伯姬。叔姬之類。蓋婦人不用表德。故但以姓繫於行第。然亦有繫於諡者。齊之宣姜。莊姜。秦之懷嬴。楚之文嬴是也。亦有繫於夫之國者。陳之息嬀是也。乃古禮。五十而後伯仲。審爾。姬姜諸婦亦老矣。古禮見檀弓。

地名悞讀

子有篝燈碎語。內載誤字一則。近見宋王雱亦作字書悞讀數篇。視予所記。詳略相當。可見古人多犯此病。然雱云不相知者。彼雖悞讀。不可與言。唯唯而已。噫。蓋避姤也。顧人生相知幾人。盡如雱言。字學永絕矣。唯是古今地名。最不可悞。因尋繹所記。參考王雱與釋適之二書。具於左。以教兒孫。

祿祿音對許。縣名。瀧水瀧音雙。縣名。汨羅汨一音密。一音博。縣名。牂牁音臧。郡名。取慮音趙。閩縣名。慮

屍音盧夷縣名。朱提音殊時縣名。盟津音孟津縣名。不其音不箕縣名。繁峙音止縣名。犍爲音虔縣名。都龐龐音龍縣名。琅邪音耶郡名。令居令音連縣名。先零音連縣名。盱眙音吁怡縣名。方與音房。豫縣名。裴縣裴音非縣名。曲逆音去過地名。胸臆音曷閭縣名。枹罕音夫謙地名。雍州雍音雍雍門同。緱氏緱音溝縣名。平谷音欲縣名。樂浪音洛郎縣名。莊浪浪音郎縣名。邯鄲音寒丹縣名。隰州隰音襲州名。鄆縣鄆音聞。岷縣岷音盛。虹縣虹音絳縣名。贛榆贛音紺縣名。費縣費音祕。郟城郟音談縣名。單父音單甫縣名。儋州儋音丹。鄱城鄱音香縣名。射洪射音石縣名。鄆城鄆音絹縣名。隆慮音林闔縣名。閿鄉閿音聞縣名。新淦淦音幹縣名。徒縣徒音斯。整屋音周賀縣名。葉縣葉音攝。涪州涪音浮。郴州郴音琛。沐陽沐音迷縣名。鄆城鄆音晏縣名。崞縣崞音郭。敦邱敦音頓縣名。桑乾乾音干地名。攔李攔音醉地名。越嶲。濁音贗郡名。鄆州鄆音夫。滇南滇音顧地名。鄆城鄆音運縣名。虢虢音斯地名。荏符音丸蒲地名。姑射射音夜山名。罕罕音罕堅地名。汭猶音求縣名。惡池音滓沱地名。休屠音朽諸國名。身毒音天竺國名。康居音染國名。于闐閼音甸國名。澶淵澶音蟬地名。澠池澠音勉地名。石埭埭音代地名。朝鮮音招仙國名。

古人名年代錯綜

馬謖謖音速。卞壺非壺音闕。武曌曌音炤。史籍籍音由。王嫫非微音美。柳玼玼音駢。李陽冰音凝。顓頊頊音昂。帝嚳嚳音谷。倉頡頡音絮。石碣碣音鵠。鄺食其歷異飢。臺駘音胡台。郤犂犂音抽。金日磾音密低。